

NAQQIUTIP

imm. 27-mut isumaliutissiissutip 23. apriliimik ullulerneqartup kalaallisuaa taarserpaa

(inatsisissatut siunnersuutip qulequtaata oqaasertaasa naqqinnerat)

**Uunga siunnersuut: Nunami inuussutissarsiutitut tunngatillugu
inuussutissarsiornermik siuarsaaneq pillugu Inatsisartut inatsisaata
allanngortinneqarneranik Inatsisartut inatsisaat nr. xx, xx. xxxx 2016-imeersoq
(Aallarnisaasunik ineriartortitsineramik ingerlataqarnermut tapersiisarneq)
(Inuussutissarsiornermut, Suliffeqarnermut Niuernermet Nunanullu Allanut
Naalakkersuisoq)**

pillugu

Inuussutissarsiornermut Ataatsimiititaliap

ISUMALIUTISSIISSUTAA

Siunnersuutip aappassaaneerreqarnerani saqqummiunneqartoq

Inuussutissarsiornermut Ataatsimiititaliaq suliarinninnermini ukuninnga inuttaqarpoq:
Inatsisartunut ilaasortaq Siverth K. Heilmann, Atassut, siulittaasoq
Inatsisartunut ilaasortaq Aqqaluaq B. Egede, Inuit Ataqtigiit, siulittaasup tullia
Inatsisartunut ilaasortaq, Suka K. Frederiksen, Siumut
Inatsisartunut ilaasortaq Iddimanggiu Bianco, Inuit Ataqtigiit
Inatsisartunut ilaasortaq Justus Hansen, Demokraatit

1. Siunnersuutip imarisaa siunertaalu

Siunnersuummi Naalakkersuisut aallarnisaasunik ineriartortitsineramik ingerlataqarnermut tapersiinissaat ajornarunnaarsinneqarpoq, tassani aallarnisaasut aallartisarnepup nalaani piffissami qaammatit 24-t tikillugit siunnersorneqarlutik isumasioqateqarlutillu ikiorneqarsinnaallutik. Ingerlatat taakkua ingerlaneranni peqataasut assersuutigalugu tuniniaanissamik nittarsaassinermik inatsisinik aamma naatsorsuuserineramik il.il. atuartinneqarsinnaapput. Tamatuma saniatigut aallarnisaasunik ineriartortitsineramik

ingerlataqarnermi peqataasut, aallarnisaasunik allanik assingusumik inissisimasunik, isumasioqateqarnissamut periarfissaqassapput. Siunertaavoq aallarnisaasut aallarterlaatut kukkunernik nalinginnaasunik aqquusaagaqannginnissaat. Aamma siunertaavoq suliffeqarfiit aallarterlaat iluatsitsisarnerisa pitsanngorsarneqarnissaa aammalu aallarnisaasut akornanni attaveqaqatigiissitsinissaq, taamaalilluni ikioqatigiinnissamut isumasioqatigiinnissamullu periarfissaqassallutik. Aallarnisaasunik ineriartortitsinermik ingerlataqarnerup nalaani suliniummi malunnaatilimmik siuariartortoqarnissaa aalajangiisuulluinnartumik pingaaruteqarpoq.

Aallarnisaasunik ineriartortitsinermik ingerlataqarnermut atatillugu pikkorissaanerup nalaani angalanissamut unnuinissamullu aningaasanik immikkoortitsisoqassaaq. Aallarnisaasut aallarnisaasunik ineriartortitsinermik ingerlataqarnermi peqataasut, piffissami qaammatit 24-t tikillugit sivilissusilimmi agguaqatigiissillugu pikkorissaanerni 4-ni peqataassapput.

Siunnersuut inatsisaavoq sinaakkusiussaq ukiumoortumik aningaasanut inatsimmi konto 64.10.17-imi sinaakkusiussat iluanni aallarnisaasunik ineriartortitsinermut aaqqissuussanut aningaasaliissutinik ataatsimoortunik pilersitsinissamik periarfissiisoq. Aningaasat aningaasanut inatsimmi immikkoortinneqartut ukiumiit ukiumut nikerarsinnaapput, tassami pisariaqartitsineq malillugu aaqqissuussineq tassani pineqarmat. Aningaasat ilaatigut aaqqissuussinernit atuutereersunit tiguneqarsinnaapput, tassami ukiuni siusinnerusuni misilittakkat takutippassuk aningaasartat immikkoortinneqartut pisariaqartitsinermut sanilliullugit annertuallaartut. Konto matumani pineqartoq arlalinnik siunertaqartoq, tassungalu ilanngullugu aatsitassanut tunngasunik aamma siuarsaanermut atorneqartartoq Inuussutissarsiornermut Ataatsimiititaliamit maluginiarneqarpoq. Aallarnisaasunik ineriartortitsinermik aaqqissuussineq atorlugu suliniutissap nunami inuussutissarsiutinik aatsitassarsiornermik ingerlatanik ilaqanngitsunik siuarsaanissamut sammitinneqassasoq Inuussutissarsiornermut Ataatsimiititaliap assut pingaartinneqarpoq.

2. Siunnersuutip Inatsisartunit siullermeerneqarnera

Partiit ataatsimut isigalugu siunnersuut tapersorsorlugulu soqutigigaat inatsisissatut siunnersuut siullermeerneqarmat paasinarsivoq. Kalaallit Nunaanni inuussutissarsiornikkut aaqqissuussinermik ullumikkornit arlalinnik sammiveqarnerusumik ineriartortitsinissamut periarfissat siuarsarneqarnissaannik inatsimmi siunertat anguniakkallu oqaaseqartartunit arlalinnit taperserneqarput.

3. Tusarniaanermut akissutit

Siunnersuut piffissami 2015-imi 4. decembarimiit 2016-imi 8. januaarimut tusarniaanermut nittartakkamiippoq.

Aammattaq siunnersuut tusarniaaffiusunut makkununga nassiuqqarpoq:

Naalackersuisut Siulittaasuata Naalackersuisoqarfia, Aningaasaqarnermut Naalackersuisoqarfik, Ineqarnermut, Sanaartornermut Attaveqarnermullu Naalackersuisoqarfik, Aalisarnermut, Piniarnermut Nunalerinermullu Naalackersuisoqarfik, Peqqissutsimut Naalackersuisoqarfik, Ilaqutariinnermut, Naligiissitaanermut Isumaginninnermullu Naalackersuisoqarfik, Ilinniartitaanermut, Kultureqarnermut, Iisimatusarnermut Ilageeqarnermullu Naalackersuisoqarfik, Pingortitamut, Avatangiisinut Inatsisinillu Atuutsitsinermit Naalackersuisoqarfik, KANUKOKA, Sulisitsisut, Kalaallit Nunaanni Politiit, Qeqqata Kommunia, Kommuneqarfik Sermersooq, Qaasuitsup Kommunia, Kommune Kujalleq, SIK, Greenland Business A/S aamma, Visit Greenland A/S.

3.1 Inuussutissarsiornermut Ataatsimiititaliap tusarniaanerp ingorlanneqarnera pillugu oqaaseqaatai

Tusarniaaffigisat tusarniaanermut akissuteqartut Naalackersuisunit allatorneqartarnissaat ataatsimiititaliamit kissaatigineqartoq Inuussutissarsiornermut Ataatsimiititaliamit siusinnerusukkut oqaatigineqarpoq. Taamaattumik ataatsimiititaliap kissaataa tamanna siunissami eqquutsinniaqqullugu Naalackersuisut ataatsimiititaliamit kaammattorneqarput. Inatsisissatut siunnersuut tusarniaaffigisanit, tassunga pingaartumik ilanngullugu inuussutissarsiornermi soqutigisaqaaqatigiiffinit ataatsimut isigalugu tapersersorneqarluartoq Inuussutissarsiornermut Ataatsimiititaliap tusarniaanermut akissutini takusinnaavaa.

KANUKOKA kommunit amerlanersaat assigalugit inatsisissatut siunnersuummut oqaaseqaateqarnissaminut tunngavissaqarsorinngilaq. Tusarniaanermut akissuteqartut oqaaseqaataannut nassuiaataannullu Naalackersuisut akissutaat inatsimmum nalinginnaasumik nassuiaatini takuneqarsinnaapput. Naalackersuisut inatsisissatut siunnersuuttip siunertarisaanut nassuiaataat itisiliissutaallu tusarniaarnermut akissutinut tiguneqartunut sanilliullugit kinaassusersiunngitsuusut, taamaalillutillu Inatsisartut aalajangiinissamut tunngavigisaannut ikorfartuutaasut ataatsimiititaliap naliliivoq.

4. Ataatsimiititaliap siunnersuummik suliarinninera

Inuussutissarsiutit pilersinneqareersut saniatigut isumassarsiat nutaat inuiaqatigiinni pinngortut Kalaallit Nunaata siunissami ilaatigut nappatigisussaavai. Taamaattumik inuit aallarnisaasartut qularnartortalimmik inuuneqarlutik isumassarsiatik tunngavigalugit imminnut napatinniarsarisut anguniakkaminnik takorluukkaminnillu piviusunngortitsinissaminni kalaallinut inuiaqatigiinnut iluaqutaasumik pitsaasunik tunngavissaqartinneqarnissaat pingaaruteqarpoq.

Nunatsinni inuussutissarsiutinik nutaanik aningaasarsiornikkut, suliffissaqartitsiniarnikkut

kiisalu nunatsinni inuuniarnikkut atugassarititaasut siuarsarnissaannut ilapittuutaasinnaasunik pilersitsineq. Inuussutissarsiutini assigiinngitsuni nutaaliornernut, aallarnisaasunut ineriartortitsisunullu qitiutillugit aallutarisatsinnut inuiaqatigiillu tungaannit isigalugu siuarsarneqartussatut kissaatigisatsinnut aningaasaqarnikkut tapersiinnermi tamanna siunertarinearpoq. Nunatsinni suliffeqarfimmik aallartitsiniarneq nunami allami aallartitsiniarnermit assigiinngitsutigut annertuumik allaanerussuteqarpoq, tassami tamaani pissutsit immikkuullarissuummata, taamaattumillu ingerlaavartumik iluarsissuteqartarnissaq taakkununggalu naleqqussartarnissaq pisariaqarmat.

Naak nunani allani iliuutsit isumassarsiorfigineqaraluartut aallarnisaasunik ineriartortitsinermut aaqqissuussineq nunatsinni pissutsinut atugassarititaasunullu naleqqussarniarneqartoq inatsisissatut siunnersuummi takuneqarsinnaavoq. Tassunga ilanngullugu aallarnisaasut unammilligassaannut ikiorsiissutaasinnaasunik internetimi oqallittarfinnik pilersitsinissami qarasaasiakkut teknologiip atornera ikorfartuutaasinnaavoq.

Aaqqissuussinerup ukiuni marlunni ingerlanneqarnissaa aammalu piffissap taassuma ingerlanerani aaqqissuussinerup ukiut affakkaarlugit nalilerneqartarnissaa naleqquttuusoq ataatsimiititaliaq isumaqarpoq. Misiligutitut aaqqissuussinernik atuineq Skandinaviami atorluarneqarpoq aammalu suliaasaqarfinni arlalinni naalakkersuinikkut iliuuseqartarnermi politikerit allaffissornermillu aqutsisut misilittagaqalernerannut peqataaqaasarluni. Misiligutitut aaqqissuussinerit piffissamut killilikkat atornerisigut soqutigisaqatigiit aaqqissuussinerup iluaqutissartaanik atorluaasut tatisinerat pissutigalugu tapiissuteqartarnermut aaqqissuussinerit sunniuteqarluangitsut ataavartunngoratarsinnaanerat annikillisinneqassaaq. Inuussutissarsiornermut tunngasuni aaqqissuussinerit piffissami aalajangersimasumi ingerlanneqartartut inuussutissarsiutinik ineriartortitsinermut nutaaliornernullu pisariinnerulernissaannut atornerqarnissaat annertunerusumik isumaliutigineqartariaqartoq Inuussutissarsiornermut Ataatsimiititaliaq tunngaviummik isumaqarpoq.

4.1 Kommunit aallarnissaasunik ineriartortitsinermut aaqqissuussinermit atuuffiat.

Inatsisissatut siunnersuummut matumani pineqartumut atatillugu kommunit atuuffiat siunnersuutip siullermeerneqarnerani oqaluuserineqarpoq. Tassunga atatillugu aallarnisaasunik ineriartortitsinermik aaqqissuussineq pillugu ilisimasat paasissutissallu siammartiterneqarnissaat siunertaralugu kommunit suleqatigalugit paasititsiniaanermik aallartitseqqullugit Naalakkersuisut Inuussutissarsiornermut Ataatsimiititaliamit kaammattorneqarput, taamaalilluni aaqqissuussineq sapinngisamik annertunerpaamik sunniuteqarsinnaaqullugu.

Aaqqissuussinerup najukkani atuutsinneqalernissaa eqqarsaatigalugu kommunit atuuffeqarsinnaanerannut inatsisissatut siunnersuut periarfissiisoq Inuussutissarsiornermut

Ataatsimiititaliaq naliliivoq. Kommunit suleqatigineqarsinnaasut Naalakkersuisunit isigineqarnerat matuma kingulianiittumi takuneqarsinnaavoq:

3. § 10, imm. 1, ima oqaasertaliorneqarpoq:

”§§ 5 aamma 5 a malillugit tapersiissutit allaffissornikkut aquneqarnissaat pillugu kommunalbestyrelsimut imaluunniit ingerlatseqatigiiffimmut allaffissornermik suliaqartumut Naalakkersuisut isumaqatigiissuteqarsinnaapput.”

Najukkani ineriartortitsinissamut periarfissat aammalu illoqarfimmi kommunimiluunniit immikkut ilisimasat pigineqarsinnaasut eqqarsaatigalugit eqaatsumik iliuuseqarnissamut aalajangersakkakut tassuuna Naalakkersuisut periarfissinneqartut ataatsimiititaliaq isumaqarpoq. Naggasiullugu ataatsimiititaliamit oqaatigineqassaaq aallarnissaasut nutaaliortullu siuarsarneqarneranni piviusut eqaatsuunissarlu tunngavigalugit iliuuseqarnissaq inatsisip aqutsivigineqarnerani siunissami tunngavigineqartariaqartoq.

5. Siunnersuutip aningaasaqarnikkut kingunerisassai

Inatsisissatut siunnersuutip aningaasaqarnikkut kingunerisassai siunnersuummut nalinginnaasumik nassuiaatini Naalakkersuisut allaaseraat. Naalakkersuisut naliliinerannit allaanerumik naliliinissaminut ataatsimiititaliaq tunngavissaqarsorinngilaq.

6. Ataatsimiititaliap inassuteqaatai

Siunnersuut akuerineqassasoq ataatsimiititaliamit isumaqatigiittumit inassutigineqarpoq.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.



Siverth K. Heilmann,
Siulittaasoq



Aqqaluaq B. Egede,
Siulittaasup tullia



Justus Hansen



Suka K. Frederiksen



Iddimangiiu Bianco